



DIE XVIII NOVEMBRIS

IN DEDICATIONE BASILICARUM

SANCTORUM APOSTOLORUM PETRI ET PAULI

DUPLEX MAJUS



ADNOTATIO

In Martyrologio Romano addenda.

Romæ dedicatio Basilicarum Sanctorum Apostolorum Petri et Pauli, quarum primam in ampliorem formam restitutam Urbanus Octavus, hac ipsa recurrente die: alteram vero miserando incendio penitus consumptam, ac magnificentius reedificatam Pius Nonus die decima Decembris, translata tamen in præsentem diem anniversaria commemoratione solempni ritu consecravit.

IN OFFICIO

Omnia ut in Breviario Romano, præter Lectiones quintam et sextam in secundo Nocturno, quæ recitandæ erunt prout sequitur.

IN II NOCTURNO

LECTIO V.

Illuc Constantinus Magnus Imperator octavo die post susceptum baptismum venit, depositoque diademate, et

humi jacens vim lacrymarum profudit: mox sumpto ligno, ac bidente terram eruit, indeque duodecim terræ cophinis, honoris causa duodecim Apostolorum, ablatis, ac loco Basilicæ Principis Apostolorum designato Ecclesiam ædificavit. Quam Sanctus Silvester Papa decimo quarto kalendas Decembris eo modo quo Lateranensem Ecclesiam quinto Idus Novembris consecraverat, dedicavit, et in ea altare lapideum chrismate delibutum erexit: atque ex eo tempore sancivit, ne deinceps altaria nisi ex lapide fierent. Idem beatus Silvester Basilicam Sancti Pauli Apostoli in via Ostiensi ab eodem Constantino Imperatore magnificentissime ædificatam dedicavit. Quas Basilicas idem Imperator multis prædiis attributis locupletavit, ac muneribus amplissimis exornavit.

Ṛ. O quam metuendus est etc.

LECTIO VI.

Porro Vaticanam Basilicam vetustate jam pridem collabentem, ac propterea multorum Pontificum pietate latius, ac magnificentius à fundamentis erectam Urbanus Octavus hac eadem recurrente die anni millesimi sexcentissimi vigesimi sexti solemniter consecravit. Basilicam vero Ostiensem quum dira incendii vis anno millesimo octingentesimo vigesimo tertio penitus consumpsisset, indefessa quatuor Pontificum cura splendidius quam antea erectam, et ab interitu veluti vindicatam Pius Nonus, auspiciatissimam nactus occasionem, qua Dogma de Immaculata Beatæ Mariæ Virginis Conceptione nuper ab ipso proclamatum, ingentem Cardinalium et Episcoporum numerum ex dissitis etiam Catholici Orbis regionibus Romam attraxerat, die decima Decembris Anni millesimi octingentesimi quinquagesimi quarti tanta circumdatus Purpuratorum Patrum, et

Antistitum corona solemniter dedicavit, ejusque celebritatis memoriam hac die recolendam decrevit.

Ṛ. Mane surgens Jacob etc.

URBIS ET ORBIS.

Digna certe est quæ in Ecclesiæ fastis adscribatur Patriarchalis Basilicæ Ostiensis, in qua gloriosum Beati Pauli Apostoli trophæum tota retro antiquitas venerata est, post dirum illud Anni MDCCCXXIII, quo conflagravit, incendium, sumptuosa, et vere splendida reedificatio pietate ac munificencia Leonis XII Pii VIII et Gregorii XVI suscepta, et continuata, regnantis vero Pontificis Pii IX ad exitum perducta; nec minus digna est quæ posterorum memoriæ mandetur Basilicæ ejusdem die X. Decembris anni superioris MDCCCLIV ab eodem Summo Pontifice Pio IX peracta dedicatio tanta cum solemnitate quantam numquam alia, nisi forte perraro vidit ætas ob ingentem Purpuratorum Patrum et Episcoporum ex dissitis etiam regionibus concursum augustam Supremi Pontificis majestatem nova veluti lucis accessione augmentum.

Hæc grato animo recolentes Abbas et Monachi Sancti Benedicti Congregationis Casinensis, qui celeberrimæ hujus Basilicæ custodiam et curam concreditam habent, supplicia vota eidem Sanctissimo Domino Nostro humiliter porrexerunt ut tanti eventus memoriam in Martyrologio, et in Breviario Romano ad diem XVIII. Novembris, qua Officium pro universa Ecclesia recurrit Dedicationis Basilicarum Sanctorum Apostolorum Petri et Pauli inseri mandaret eo vel magis quod sapientissimi ipsius Decessores Urbanus VIII et Benedictus XIII hoc idem olim jusserint quoad Patriarchales Basilicas à se consecratas Vaticanam, et Lateranensem.

Has itaque preces, referente me subscripto Sacrorum

Rituum Congregationis Secretario, quum Sanctitas Sua benigne duxerit excipiendas, mandavit ut in Martyrologio Romano ad diem XVIII Novembris prævia huic Decreto adnotatio inscribatur, et in Breviario Romano Lectiones quinta et sexta prædicti Officii Dedicationis Basilicarum Sanctorum Apostolorum Petri et Pauli refoventur juxta exemplar supra descriptum; servatis ceterum Rubricis. Contrariis quibuscumque non obstantibus. Die 29 Martii 1855. = C. EPISCOPUS ALBANEN. = CARD. PATRIZI = S. R. C. PRÆF. = Loco † Sigilli. = H. Capalli S. R. C. Secretarius.

